

欽
定
全
唐
文

欽定全唐文卷六百四十六目錄

新文藝出版社藏書

李絳二

論安國寺不合立聖德碑狀

論澤潞事宜狀

論河北三鎮及淮西事宜狀

論鎮州事宜狀

請以李錡財產代浙西百姓租稅狀

謝密賜宣勞狀

學士謝狀

謝宣慰狀

謝宣慰狀

謝宣慰狀

論裴均進銀器狀

論盧從史請用兵事狀

論張茂昭事狀

論簡勘楊憑家產狀

論德音事狀

賀德音狀

論許遂振進奉請驛遞送至上都狀

論延州事宜狀

論易定事宜狀

兵部尚書王紹神道碑

欽定全唐文卷六百四十六

李絳二

論安國寺不合立聖德碑狀

陛下布惟新之政剋積習之弊行前王所不能行革歷代所不能革四海延頸日望德音今忽自立聖政碑示天下以不廣彰滿假之漸招矜炫之譏易稱大人者與天地合德與日月合明執契垂拱勵精求理化成天下高視百王豈可以文字而盡聖德又安以碑表而贊皇猷若可敘述是有分限乃反虧損盛德豈謂敷揚至道哉故自堯舜禹

湯文武並無建碑之事至秦始皇荒逸之君煩酷之政然後有罾嶧之碑揚誅伐之功紀巡幸之跡適足爲百王所笑萬代所譏至今稱爲失道亡國之主豈可擬議於此哉陛下嗣高祖太宗之基舉貞觀開元之政思理不遑食從諫如順流固可與堯舜禹湯文武方駕而行又安得追秦皇暴虐不經之事而自損聖德近者閭巨源請立紀聖功碑陛下詳盡事宜皆不允許今忽令立此碑與前事頗乖可否相違是非殊異况此碑旣在安國寺中不得不敘載遊觀崇飾之事述遊觀且乖理要敘崇飾又匪政經固非

哲王所宜行也伏乞聖慈特賜寢罷臣職忝近密理合獻
陳庶申葵藿之誠冀增海岳之大謹奏

論澤潞事宜狀

臣昨已具狀陳烏重允不可便授以澤潞請與河陽却除
孟元陽澤潞臣進狀後至日晚方見承瓘文狀奏行營事
宜其烏重允承瓘已會與文牒令勾當留後詳覽驚嘆實
所痛心且澤潞五州據山東要害河北連結惟此制之磁
邢洛三州入其腹內國紀所在實繫安危比者磁道爲從
史所據克狡情狀昭然可知比年與劉濟王士真相結又

奏其男充都知兵馬使如此奸狀聖情具知今地降靈陛下神畧坐致克豎却收一道奈何欲與重允却棄此鎮陛下昨追從史者庶於利害須以計擒然於國家已失大體今澤潞重鎮承璀輒以文牒便差人爲留後遽請旌節無君之心孰甚於此陛下昨收澤潞人神同慶國柄再立制度重顯今忽與本軍將物情頓沮朝經大紊自削形勢却恐不如從史向者從史雖懷蓄姦蠹已受朝命方鎮今重允一時素無功策承璀一牒便居重位河南河北諸侯聞知憤怒之心必生言語蓋以專權日久莫不各有將校且

懼且恨必謗朝廷皆謂重允與承瓘交通作計遂却從史
代其使主便與節度豈唯事同致怒實亦人情難堪儻劉
濟茂昭季安執恭韓宏師道恥有名位與重允同列繼有
表章陳其情狀并承瓘專授重允之罪不知陛下何以處
之若總不答卽方鎮之心大阻若別處分卽朝廷之體頓
虧是令承瓘取怨天下從史以澤潞不容遂至狼狽若承
瓘爲天下不容何以自保或恐因此遂亂今重允便除河
陽亦是望外之福况新有從史事豈慮重允遲迴重允所
得方隅已是承瓘之力元陽若與澤潞又是事望所推不

唯忠義堪爲腹心兼有才畧實可委任兩河方鎮亦必忻
懼朝廷制度又再修舉利害懸遠事在不疑况重允須爲
從史結託劉濟士眞構間虛辭爲國生事至使聖恩特遣
朝官委曲宣諭僅得寧止如是則事跡固無遠大臣豈與
重允嫌隙豈與元陽有親故蓋爲社稷之計朝廷之勢可
惜爾伏望聖恩斷在不疑與重允河陽足以賞逐從史効
與元陽澤潞足以壓河北諸侯之勢朝廷收得威柄承璀
免有負憂責機便易失時事難遇伏望定於神慮遂此至
公臣等懇切上陳不避忌諱者伏以獲居近密特授恩光

若緘不言上負陛下伏惟聖慈俯鑒愚款速降制命以副人心

論河北三鎮及淮西事宜狀

羣臣見陛下西取蜀東取吳易於反掌故諂諛躁競之人爭獻策畫勸開河北不爲國家深謀遠慮陛下亦以前日成功之易而信其言臣等夙夜思之河北之勢與二方異何則西川浙西皆非反側之地其四隣皆國家臂指之臣劉闢李錡獨生狂謀其徒皆莫之與闢錡徒以貨財啗之大軍一臨則渙然離耳故臣等當時亦勸陛下誅之以其

萬全故也成德則不然內則膠固歲深外則蔓連勢廣其將士百姓懷其累代煦嫗之恩不知君臣逆順之理論之不從威之不服將爲朝廷羞又隣道平居或相猜恨及聞代易必合爲一心蓋各爲子孫之謀亦慮他日及此故也萬一餘道或相表裏兵連禍結財盡力竭西戎北狄乘間窺窬其爲憂患可勝道哉濟季安與承宗事體不殊若物故之際有間可乘當臨事圖之於今用兵則恐未可太平之業非朝夕可致願陛下審處之且以吳少誠病必不起淮西四旁皆國家州縣不與賊通朝廷命帥今正其時萬

一不從可議征討故臣願捨恒冀難致之策就申蔡易成之謀脫或恒冀連兵事未如意蔡州有釁勢可興師復以財力不贍而赦承宗則恩威兩廢不如早賜處分

論鎮州事宜狀

臣等再三思度敢不詳審伏以鎮州人心固結難卽改移隣境事同必相扶會當其無事則相疑沮見有改易則却同心意者以子弟爲謀他日還慮及此情狀可見事理昭然今若欲除大臣守鎮臣愚必知未可不如且示懷撫以收其心所以頻有奏陳伏冀俯存含忍實慮別除人後制

命不行卽須興師且事征討蓋以江淮水旱人力困窮陛下每切憂勞尚加賑卹財賦所入經用不充今若鎮州用兵須令諸處進計用兵數供費已多萬一四隣之中同類潛相扶結相爲影援延引歲時則爲患益深所費轉廣縱陛下悉出府庫以給軍須若更淹延將何及計兵連之後勢不得休北狄西戎素多姦狡忽乘間隙侵犯邊疆又須興兵以事防遏首尾應敵則內外憂危臣等必知興師未可自陛下臨御天下諸州連帥頻建軍功言事者不計始終喜功者輕議討伐今鎮州事勢與劉闢李錡不同何者

劔南瀾西本非反側之地劉闢李錡暴生狂逆之心唯以財貨誘人人心本無結固又四面皆是國家兵鎮事與河北不同所以懇請誅討料其事勢舉必萬全今鎮州事宜與此有異外則結連勢廣內則膠固歲深以此用兵必爲不可其劉濟季安雖有疾患至於事體與鎮州畧同若亡沒之後或別有其便卽相其便可否臨時裁制伏以崇勲盛烈底定四方必有其時可以斷致自鎮州有故臣夙夜思量誠願因其此時收得一道事有未可不敢因循瀝竭肺肝備陳愚款貴得萬全之計上酬不次之恩事之安危

伏冀聖慮所切惟望不納浮議斷在宸衷臣不勝懇切之至

請以李錡財產代浙西百姓租稅狀

李錡兇狡叛戾僭侈誅求刻剝六州之人積成一道之苦陛下哀憫無告爲之弔伐變愁怨之氣爲發生之和歌舞聖時負戴恩德其李錡家所積錢帛皆斂於人或有酷發冤濫之徒斃其身取其貨或有枉法徵剝之更加其罪納其財前後事狀布聞遠邇聖恩本以叛亂誅討蘇息一方今輦運錢帛播聞四海非所以式遏亂畧惠綏困窮也伏

望天慈下痛哀之詔降雨露之澤將逆人財物並以賜本
道代浙西百姓今年租賦則萬姓忻戴四海歌詠矣

謝密賜宣勞狀

奉宣密旨以臣所論奏事頗切時要特賜慰勞者臣伏蒙
獎擢致於近密苟有所見卽合啟陳敢望聖明照臨皆賜
俯察載降宣諭曲示恩私榮感交深兢跼無地臣所陳之
事非止一端實政理之源繫安危之切冀望重於所忽防
於至微則億兆生靈同慶仁壽

學士謝狀

臣絳等今日伏蒙聖恩召對特賜延納過有獎諭又奉宣
聖旨卿守職盡忠常如今日朕何憂天下不理又復見襄
陽進奉出付所司安國寺鑄聖容處又罷臨幸者親奉德
音旋蒙宣諭目覩盛事心感皇明喜戴交并抃舞失次伏
以陛下憂勤庶政推以至公容納直言事惟求當臣等恭
守職分自合罄竭愚衷豈望天眷綢繆特加獎諭感恩激
切倍百常情至於慎守德音出外方之獻嚴重清蹕罷近
寺之游此皆發自宸衷卓然光大足以動四方之聽感萬
國之心臣等職在禁闈時逢昌運以欣以忭意不能宣

謝宣慰狀

今日中使某乙奉宣聖旨恩私俯降抃躍難勝伏以恩澤所覃積弊盡去事關聖政感極人心臣等職忝禁闈喜倍常分奉章陳賀未盡懇誠曲蒙聖慈更賜宣勞感恩承命榮幸實深

謝宣慰狀

今日中使某至奉宣聖旨以陰陽差序時雨愆期朕每事增修冀感和氣卿等悉心奉上副朕憂勤今有甘澤與卿等同慰者臣伏以時雨旣降百姓歡欣聖念猥加特使宣

諭喜戴交集忭舞失圖臣聞惟天無私去人不遠與聖合
德有感必通福應之際其猶影響陛下以自春以來陽候
稍亢慮成旱暵妨此農功憂勤之誠旣形造次惕厲之志
不忘寢興爰降德音大修政本過此克責勤求闕遺絕貢
獻以字黎元務減省以崇簡易去當今之甚弊行歷代之
所難發自宸衷曉示天下人心旣感和氣自通曾未浹旬
遂降膏雨公私和暢動植生榮麰麥可望於豐盈耕耒不
憊於節候康衢士庶鼓闕無地歡呼感荷皇恩致此甘澤
則知憂先於事故能無憂事至而憂事故罕救此雖古先

哲后修已備災引六事以責躬念一物之失所感應遄速
豈過於斯臣等職忝禁闈親承密命無裨萬一喜遇聖明
理之當者無不行政之失者無不革累積盛美將致昇平
感抃欣榮實倍常品

謝宣慰狀

今日奉宣聖旨以立皇太子制下特賜宣示臣者祇奉詔
命歡抃失容伏以時屬昇平運逢交泰陛下思固大本以
承鴻休爰命元良式昭茂典無疆之祚惟永至德之光日
宣億兆生靈鼓舞欣戴臣猥惟淺陋獲奉軒墀特降睿慈

金定全集卷之四十一
俯賜宣示以榮爲荷倍百常情

論裴均進銀器狀

陛下聖明之德超邁百王英特之姿跨越千古察百役之繁猥愍萬姓之愁苦念杼軸之積弊知姦臣之徇私外以進入爲名內以賄遺爲計厚斂於下半入其家所以特降鴻恩大拯頽俗罷方鎮不時之貢禁天下無藝之費蘇息下民革除宿弊頒宣之日遐邇必臻感恩涕泣仰聽歌舞更相謂曰不圖今日復覩聖時利澤布於四海德施周於萬類家吟戶詠氣舒目明纔及數月今自廢罷受納裴均

所進銀器天下之人皆謂詔書不信必謂陛下以財貨爲先此人非益於聖德也且裴均行不繇道姦以事君固違制書敢進銀器此是試陛下之意若不容納必知英主不可以利啗則須恭守典憲尊朝廷若爲受領則知聖懷必可以財動因此厚斂於下此不忠不誠之大罪也倘陛下以裴均位當藩鎮官極崇顯未能行法以懲姦人伏望准制書令度支收納既不違勅文又免入內庫無虧聖政以示外方

論盧從史請用兵事狀

從史比來事跡彰露頗多意不自安務欲生事所以曲陳利害頻獻計謀冀許用兵求姑息今親領士馬欲往邢洺假以就糧實爲動眾去就之際情狀可知伏願聖德備詳端緒用絕其情不許此行事臣愚竊料從史必更密陳利害求動師旅爲輸忠誠苟私於身非利於國更有奏請伏望以此隄防

論張茂昭事狀

伏以茂昭舉家朝覲河北都無此例雖本情自任不得在外體殊可嘉稱須降恩榮以存激勸今迪簡除易定節度

茂昭便是前衡行理之間恐非穩便又所隨將健悉屬定
州茂昭寂寞於體非宜伏望聖恩速除茂昭一官并專使
宣諭從將校悉令取茂昭處分到京別有進止如此處置
實協事情謹具奏聞伏候聖旨

論簡勘楊憑家產狀

伏以楊憑犯賊憲司推勘舉正朝典肅清人心此蓋理之
宜然法度之當爾臣但不知楊憑所犯輕重若所坐祇緣
贓污法令且有明文合待推勘事終後徵贓定罪今所與
宗儒詔令一物已上具數聞奏卽宗儒受詔之日便合勘

金史卷之二十一
賁家資遠近流傳有似簿錄凡簿錄家產皆是逆人至犯
賊不合同例伏以聖恩再三立法度必歸至公事體之間
貴於允當臣苟有所見不敢不陳

論德音事狀

今日奉宣聖旨如前臣等伏以時旱稍久聖慮時深思降
德音除人疾苦比來方鎮過有進奉因此聚斂恣爲剝害
遂使百姓積怨愁之氣陛下有納進之名臣雖頻奏已蒙
寬納今特有處分使載在德音實王政之大猷爲時事之
切務上符天意下感人心和氣旣通甘澤必應其合進奉

外尚慮方鎮私有聚斂者但德音嚴加約束如有違越令
在必行仍令御史臺及出使郎官御史察訪聞奏比來制
勅雖下多至因循不守患在賞罰不立不患朝廷不知聖
心不移下誰敢犯其嶺南風俗百姓多賣買不得驅掠百
姓爲口禁止條約犯者依前令有司糾察聞奏橫賊擾亂
皆由於此今有明勅處分足以感動其心

賀德音狀

伏以聖恩緣時稍憊旱特發德音誠意憂勤每事節儉停
罷進奉降免囚徒廢馬宮人旣從減省私率公債又悉蠲

除戒長吏之貪求禁遠人之驅掠大革時弊特出聖懷下
感人心上符天意實帝王之盛事爲史策之輝光斯則唐
堯虞舜之明未過於此貞觀開元之盛復覩於今鼓舞億
兆之歡心丕降至誠之德意澤以周地陰陽之候自和德
旣動天雲雨之施何遠臣等叨居近地獲奉聖時感忭忻
勸實倍常品

論許遂振進奉請驛遞送至上都狀

伏以本置館驛祇緣使命有司所支食料減刻已恐不充
今若進奉貨財悉令館驛遞送豈唯館驛不濟實慮州縣

難堪且財貨數多差夫遞送便須防援轉益勞煩伏恐人力凋殘物議喧謗况館驛所破並是官錢虛有省脚之名實致擾人之弊儻若有利無害承前久合行之脫若諸道悉然卽是制度紊亂事傷聖政不敢不言伏望與遂振詔中處分且依舊例庶望公私通濟事體合宜其詔草未撰伏望聖旨

論延州事宜狀

延州所管皆新蕃人比來部落擾動多因官吏貪尅失於恩信務於誅求致控制無方威惠不及塞門要地切在鎮

安自朝廷初除延勞領延州眾情卽以爲未當其選今沙陀等果有不安撫馭之間必有所失恐日久轉弊須務遠圖伏望聖恩令別擇才識相當者充刺史辭對之日賜其誠勅冀種落懷附皇風宣暢俯接京畿使知典法謹具奏聞伏惟聖旨

論易定事宜狀

臣訪聞易定事宜今實感迫人情惶駭迪簡憂危蓋緣府庫空虛村鄉匱竭賞給將士徒設空言密近強隣勢有反變况易定地當要害深在河北腹中此鎮不可不存此急

不可不救又聞迪簡以衣糧闕絕解還軍徒至多以臣愚慮便恐致亂何者易定舉軍歸國將謂從此保安今乃困迫於前時退散於今日懼怨恨之輩潛蓄姦謀隣道誘扇便生變故事若一失豈可復收欲令諸道可以効順以此之故不可不憂今所賜綾絹五萬匹臣竊恐太少賞給用度未濟事機伏望聖恩更賜五萬匹通前十萬匹卽冀救其急切副彼憂危稍悅人心永便國計安危所繫不敢不陳

兵部尚書王紹神道碑

元和九年冬十一月晦銀青光祿大夫兵部尚書判戶部
事上柱國太原郡公食邑二千戶王公歿於位君失所重
人懷其舊大事在戎以寧禍亂公實居兵部聚人曰財以
遷有無公實領地官天子以兵賦之柄俾於公公以忠勞
之力事於上垂玉佩累金印錫珪錫劔書社開國鬱積公
望綢繆主恩出入三朝始終二紀非重而何非舊而何公
諱紹字德素其先秦將翦之後翦孫離楚漢之際以秦圍
趙死於師子孫家於太原世爲令族曾祖威衡州耒陽令
祖思獻襄州襄陽令父瑞工部員外郎及公貴累贈禮部

尚書咸以盛時沉於下位積有惇德宜生達人公尚書第三子也少以厚實爲士友所重太師顏魯公守吳興特器之表授武康尉相國蕭徐公察守馮翊並隨府授檄丁繼太夫人憂服除累授殿中侍御史江西觀察推官遂踐臺閣自倉部員外郎遷戶部兵部郎中專判戶部事未半歲超拜戶部侍郎寵賜金紫復加朝散大夫卽舊官判度支特遷戶部尚書所領仍舊順宗諒闇姦竊柄拜工部尚書以錢穀自闕俾去異已誠私計也上卽位天下文明彝倫攸敘檢校吏部尚書東都畱守判都省事兼御史大夫

充東都畿汝州都防禦使保釐東郊鎮衛舊都風令旣行
姦盜出奔遷檢校尚書右僕射徐州刺史兼御史大夫充
武寧軍節度支度營田兼徐泗宿濠等州觀察處置等使
居鎮六年復徵拜兵部尚書明年春詔兼判戶部事在位
三歲享齡七十有二徹席於長安永樂里之私第優詔追
贈尚書右僕射長子前門下省典儀元泰次子劍南東川
節度掌書記大理評事攝監察御史元質幼子前右威衛
倉曹參軍元弼等克稟詩禮備著文行以十年秋八月四
日奉窆窆於萬年縣之洪固鄉以夫人贈西河郡夫人相

李氏祔焉夫人故河南少尹知府事贈工部侍郎造之長女茂於懿範歸於令人先公而歿距茲十九年矣異時同穴周公之制也夫君子之行已事上也必執心而端其始立事而保其中踐道而要其終當建中末盜起轂下乘輿南狩巴梁阨區廡藏空虛武旅氣下德宗色動公時爲御史大夫包佶水陸運鹽鐵判官懷章表披荊棘懸束車馬陵踐山谷達本府之誠懇策書獻當使金綵縑帛爛若波濤積如邱陵上於是敷大號以布天地之施士由是濡厚澤以奮雷霆之用將加寵授以獎忠勞公方以國難疚懷

求以詔書復命致遠之度當時所稱豈不曰有其始乎貞元中公以材智任職忠懃注意不疑可以進退海內之士可以綰攝天下之柄人心所傾台位如寄公理財以義下不厭其取處權以道上不惡其專內守持盈之誠外宏推美之度及門而進與公同升布於顯列由乎陰隲誠無二事績著一心豈不曰有其中乎元和初徐方喪師帥人怙亂樂於禍以幸其利鼓其變以成其私氛沴已凝氣燄方作公授鉞以出投袂而馳倍道而乘其未備輕騎而出其不意先迷得主大眾歸心於是安進達以三百騎叛於河

城械繫而行乎軍令唐重靖以一千人奔於堽橋檄召而收其武力散私積以勞賞發義徒以祛弊推以誠信滌其疵瑕頑固革心疆內如春武經戎畧存爲故事豈不曰有其終乎是三者忠存於國政在於人遺績未映美化猶新况乎顯持世權陰行相事造膝承顧沃心獻議注百辟之耳目奔九流之車騎入司國賦之重出膺邦聞之寄考終厥命歸全於位非夫貞固幹事明哲保身曷以臻於是乎然則篆貞珉表陵谷庶乎實德宜無愧辭其洪纖之跡顯晦之用應機之速奮才以光赫其位得君以薰灼於時備

用於隴西之狀精覈於宏農之誌今所書大者遠者而已
文有詳畧蓋春秋之義焉銘曰

天賦才兮遇有期臣擇君兮審厥時公之達兮世所資道
之行兮人罕窺筦國權兮家以肥庭邦賦兮物不欺人意
傾兮主念隨陰德及兮顯命施龍上空兮盜乘機位陽尊
兮姦用奇聖運啟兮大人造王氣蕩兮英風掃用邦鎮兮
徐方道洛邑思兮彭城禱順者化兮叛者討肅如霜兮偃
如草中外便兮恩寵殊遷司馬兮領司徒趨丹墀兮伏青
蒲杜私門兮關公途期方遠兮帝命俞運何屈兮吾道孤

松楸列兮龜筮符琬玉琢兮陵谷虞往矣已焉兮噫噉鳴呼

欽定全唐文卷六百四十七目錄

元稹一

奉制試樂爲御賦

善歌如貫珠賦

鎮圭賦

觀兵部馬射賦

郊天日五色祥雲賦

范傳式可河南府壽安縣令制

王昫等升秩制

金史卷一百一十五
職官一
二
一
高端等授官制

李昆可權知滑州司馬兼監察御史制

劉頗可河中府河西縣令制

王迪貶永州司馬制

王悅等可昭武校尉行左千牛備身制

崔適等可翊麾校尉守左千牛備身制

姚文壽可冠軍大將軍右監門衛將軍知內侍省

事制

徐智岌可雲麾將軍右監門衛將軍知內侍省事

制

邵常政等可內侍省內謁者監制

宋常春等可內侍省內僕局令制

青州道渤海慎能至王姪大公則等授金吾將軍

放還蕃制

青州道渤海大定順王姪大多英等授諸衛將軍

放還蕃制

令狐楚等加階制

蕭俛等加勲制

蕭俛等加封爵制

李逢吉等加階制

李光顏加階制

王仲舒等加階制

郭釗等轉勲制

武儒衡等加階制

崔元畧等加階制

胡証等加階制

諸史收淄青敘錄將士等授官爵勲制

劍南西川節度使下將士史憲等敘勲制

鄭氏封才人制

第七女封公主制

王承宗母吳氏封齊國太夫人制

李愬妻韋氏封魏國夫人制

贈田宏正等父制

贈烏重允等父制

贈韓愈等父制

贈韋審規等父制

贈田宏正母鄭氏等制

追封孔殲母韋氏等制

追封李逢吉母王氏等制

追封李遜等母制

追封王潛母齊國大長公主制

追封王璠母李氏等制

贈鄭餘慶太保制

贈賻王承宗制

贈賻裴行立制

贈陳憲忠衡州刺史制

贈楚繼吾等刺史制

更賜于頔諡制

追封宋若華河南郡君制

授入朝奚大首領梅落悟孤等二十五人官階制
授入朝契丹首領達于只枕等二十九人果毅別
將制

欽定全唐文卷六百四十七

元稹

稹字微之河南人擢明經判入等補校書郎元和元年舉制科對策第一拜左拾遺穆宗朝擢祠部郎中知制誥入翰林爲承旨學士長慶二年進同中書門下平章事貶同州刺史改浙東觀察使太和四年拜武昌節度使卒年五十三贈右僕射

奉制試樂爲御賦

以和樂行道之本爲韻依次用

臣伏奉庚寅之詔曰天子以樂爲御其義則那臣以爲引

重任者無御不可播盛德者非樂而何蟠乎地而際乎天
周流既超於馬力發乎邇而應乎遠馳聲亦倍於鑾和喻
之爲至此實居多大道既移則舞行象成於覆載小戎或
駕則琴音決勝於騶歌故聖王取彼驪然喻諸沃若制其
節奏戒乎行作聽祈招之什冀絕跡於奔車賦盤遊之詞
俾慮危於朽索是以南薰馳而虞德盛北里騁而殷道惡
控海內當並驚於勲華執人柄豈爭功於良樂斯御也動
無險阻發自和平周旋罔害歡愛則行止之而優游靈府
推之而浹洽寰瀛非勞輶輶但布莖英陋乎足跡運以精

誠爾或馳驅難期於無災無害我之步驟乃在於大鳴小
鳴故曰得禽而詭遇不如率獸以仁聲且跋涉者疲於山
川條暢者格乎穹昊慕入律而百蠻磨至錫有功而諸侯
軌道豈出戶庭非專擊考乘六氣之辨哂六轡之徒施鼓
八風而行知八駿之非寶於是屏造父命后夔或無聲而
至矣或先進以道之豈獨周域中而利其銜策亦將肥天
下而淪乎膚肌若此則宇宙蓋由乎一馬牽制盡在於四
維雖質文更變而公共操持莫不得之者昌失之者損俗
化清而鞭扑廢和順積而車書混故臣稹前跪而言曰引

重任者御爲之先播盛德者樂爲之本伏惟皇帝陛下推是心而居其奧臣徒欲貢所聞而安敢窺其間

善歌如貫珠賦

以聲氣圓直有如貫珠爲韻依次用

珠以編次歌有繼聲美綿綿而不絕狀纍纍以相成偏佳朗暢屢比圓明度雕梁而暗繞誤綴網之頻驚響象而然非謂結之以繩約氣至則爾故可貫之以精誠原夫以節爲珠以聲爲緯漸杳杳而無極以多多而益貴悠揚綠水訝合浦之同歸繚繞青霄環五星之一氣望明月而宛轉感潛蛟之歔歔若非象照乘之珍安能忘在齊之味其始

也長言邐迤度曲纏綿吟斷章而離離若間引妙轉而一
一皆圓小大雖倫離朱視之而不見唱和相續師乙美之
而謂連當其拂樹彌長凌風乍直意出彈者與高音而臻
極及夫屬思漸繁因聲屢有想無脛者隨促節而奔走以
洞徹爲精英比瑕疵於能否次第其韻且殷勤於士衡之
文上下其音謂低昂於游女之手窈窕遠矣徘徊繹如髣
髴成象玲瓏構虛頻寄詞於章句之末願連光於咳唾之
餘清而且圓直而不散方同累丸之重疊豈比沉泉之撩
亂懼無知者初憫默於暗投善則返之乃因循於舊貫美

清冷而發越憶輝光之璀璨始終雖異細大靡殊中規矩於圓折成條貫以縈紆似是而非賦湛露則方驚綴冕有聲無寶歌芳樹而空想垂珠美惡難掩前後不踰亦比掄材而至者豈獨善歌之謂乎

鎮圭賦

以王者端拱四維鎮寧爲韻依次用

天子之鎮圭十有二寸其長義在撫十有二州之域而爲億兆之王圭比德焉所以表特達之美鎮大名也有以示彈壓之強以之徵守則有土之臣至以之恤患則受災之地康當宁無爲於南面朝日有事於東方會百辟而執之

班五瑞於來者作山龍之端表我則清光皎然雜蒲穀以
成行爾則鞠躬如也想夫彤闈乍曉碧砌生寒當玉座而
高居狀中峯之冠瑤岫透爐烟而迴出意秋月之壓雲端
是以聖后矜持庶寮瞻重安八荒於度內故捧必當心握
萬務於掌中故大不盈拱映冕旒則璿樞星綴間黼黻而
瓊枝花擁豈獨使威儀可觀亦以明社稷有奉美哉聖人
之制器也靡不有類銳上以象天方下而法地備采章以
盡飾璪崇高而定位夫衆色不可以雜施依方面之正者
惟五羣山不可以咸寫選域中之大者有四盡舉凡而得

一故相傳而莫二義存敬慎道在底綏詳觀組約足辨操
持俾經制之不亂若縹緲之相維况國家備物繼周垂衣
體舜自天有命非因桐葉而封唐提象握機故配土行而
執鎮豈惟傳歷代之瑞寶抑亦彰受命之符信者也重曰
圭銳也睿作思而百志靈鎮安也安於道而萬物寧亦嘗
三復斯名矣所以表道德之惟馨若此則君爲道之本器
乃道之形苟能據於道而依於德亦可以執無名之璞而
逍遙乎大庭

觀兵部馬射賦

以藝成而動舉
必有功爲韻

大司馬以馳射而選才衆君子皆注目而觀藝至張侯之所乃執弓而誓誓曰今皇帝製羽舞以敷文德擇材官而奮武衛兼以超乘者爲雄不惟中鵠者得祭用先才捷志亦和平以多馬爲能故以馬爲試以得鹿爲美故以鹿爲正豈獨武人之利實惟君子之爭射者皆曰諾雖五善之未習庶一舉而有成於是馬逸駢駢士勇伾伾蓄銳氣候歌詩初聽采蘋之章共調白羽次逞穿楊之妙忽縱青絲旁瞻突過咸懼發遲冀驥足之展矣翻猿臂而射之揮弓電掣激矢風追方當耦象決裂麗龜砮爾摧班示偏工於

小者安然飛鞚故無憂於殆而信候蹄之不爽則舍拔之
無遺故司射舉旌以効勝曰爾能克備我爵可期賈餘勇
者宜乘破竹之勢善量力者當引負薪之辭由是靡不爭
先莫肯爲後皆曰措杯於肘十得其九忝明試者亦何嘗
而不有破的之術萬不失一凡獻藝者豈自疑於無必衝
冠髮怒揚鞭氣逸引滿雷砰騰凌飈疾皆窮百中之妙盡
由一札而出乃知來者之藝蓋亦前人之匹若此則蹲甲
壯基揚觶觀孔信一場之獨擅終六轡之未總豈比乎浮
雲迴度開月影而彎環驟雨橫飛挾星精而搖動雖當至

理不忘庸功天子垂衣儼鵷行於北闕夏官司馬閱騎從
於南宮貢士之程職思其舉會款塞五方之俗觀校埒百
夫之禦得雋爲雄唯能是與星郎草奏上獻拱辰之防天
驕解顏喜見射鵬之侶客獨顧之而笑曰此蓋有司之拔
萃固非吾君之右汝我有筆陣與詞鋒可以偃干戈而息
戎旅司文者聞之而驚曰爾其自礪於爾躬吾將獻爾於
王所

郊天日五色祥雲賦

以題
爲韻

臣奉某日詔書曰惟元祀月正之三日將有事於南郊直

端門而未出天錫予以靈瑞是何祥而何吉臣拜稽首敢
言其實陛下乘五位而出震迎五帝而郊天五方騰其粹
氣故雲五色以相宣控壇乍直捧日初圓獸蹲而龍鱗熠
熠鳥跂而鳳翼翩翩羽蓋凝而軒皇暫駐風馬駕而王母
欲前影帶旂常疑錯繡之遙動昭章文物比摛錦之相連
觀之者無小無大謂之曰若烟非烟昔者卿雲作歌於虞
舜白雲著詞於漢武皆跂望而爲言非仰觀而遂覩今陛
下德至天地恩覃草莽當翠輦黃屋之方行見金枝玉葉
之可數陋泰山之觸石方出鄙高唐之舉袂如舞昭布於

公侯卿士莫不稱萬歲者三並美於麟鳳龜龍可以與四
靈而五於是載筆氏書百辟之詞曰郁郁紛紛慶霄之雲
古有堯舜幸得以爲君象胥氏譯四夷之歌曰煒煒煌煌
天子之祥唐有神聖莫敢不來王帝用愀然曰予何力澤
未周於四海雲胡爲而五色來爾羣后舉爾眾職因五行
以修五事由五常以厚五德正五刑以去五虐繁五稼以
除五賊苟順夫人理之父子君臣安知夫雲物之赤黃蒼
黑進我輦路就我陶匏雖有光華之萬狀不若豐穰於四
郊凡百庶寮相趨而顧稍疑江上之綺果異封中之素補

天者雖欲抑之而不出吞筆者安可寢之而無賦越明日
臣稹詠霈澤於雞竿之前覩斯雲散之爲五采之湛露

范傳式可河南府壽安縣令制

勅范傳式御史府多以法律見徵苟覆視之不明於薄責
而何道傳式在先朝時嘗爲監察御史會孫革以廢牧競
田之獄來上朝廷意其未具復命傳式理之不能精求盡
以前却使岐人眾來告我職爾之由須示薄懲用明失實
嗟乎長人之吏信在言前當革非心無因故態過而不改
寧罔後艱

王昺等升秩制

勅王昺等乃祖乃父勤勞邦家佐吾先臣相國捍患摧凶
世爲勲籍故吾聞成德諸將心猶悚然爾等初喪元戎能
以衆整送迎新舊之際不無夙夜之勞言念功庸宜升秩

序

闕二字

憲署命之崇班特示加恩匪用彝典

高端等授官制

勅高端等周官歲終則稽其醫事以制其食斯亦賞勞之
典也爾等皆執藝術待詔公車和六飲六膳以會其時察
五色五聲以知其變朕嘗因苦口必念沃心每思藥石之

臣咸聽肺肝之語凡百多士無以美疢愛予因爾厥官用
警有位

李昆可權知滑州司馬兼監察御史制

勅李昆日者王承元以成德喪師之狀來告爾實將之能
使承元之意上通朝廷之澤下究昆有力焉將議獎勞是
宜遷秩郡丞憲吏用表兼榮

劉頗可河中府河西縣令制

勅劉頗朕以自鄜而北夷夏雜居號爲難理乃詔執事求
才以綏懷控壓之者皆曰頗在茲選且言其伐蔡之役常

參謀於懷汝之師部分馳張允協軍政遂命試領銀州郡
事衆庶寧附邊人宜之連帥以聞議請甄獎河西近邊擇
吏惟精勿吝牛刀爲我烹割

王迪貶永州司馬制

勅王迪爲吏不廉受賄六千餘萬據其贓罪合寘重條言
事者以爲伐蔡之時陷其家屬適遭蜂蠆並爲鯨鯢尚念
爾於茲當從末減議遷郡佐無忘悛心可守永州司馬員
外置同正員仍所在驛發遣

王悅等可昭武校尉行左千牛備身制

勅執千牛刀以侍奉吾左右者命子弟之選也莊憲皇后
姪王悅等或勲戚蔭餘或公卿貴允佩觿有趨蹌之美釋
褐參侍從之榮勉奉我朝廷之儀敬順爾父兄之教可依
前件

崔適等可翊麾校尉守左千牛備身制

勅三品子崔適等左右備身在吾旒宸之側非貴遊子弟
之可親信者不在選中爾等閥閱甚崇教誨斯至事我猶
事父畏法猶畏師勿惰勿佻以期無誨斯可與成人並行
於朝廷矣

姚文壽可冠軍大將軍右監門衛將軍知內侍省

事制

勅姚文壽出入中外備嘗劇職靜以自勝高而益謙先皇
帝以其忠愿謹信知書有文每決務宮中付以密命已事
而復終無漏言朕方藉良能奪其情禮起自哀疚命爲監
臨和而有常威而不侮修身處衆兩得其宜憂服旣除庸
功可獎崇階厚秩兼以命之無忘慎修用副毗倚

徐智爰可雲麾將軍右監門衛將軍知內侍省事

制

勅徐智岌邠之地后稷公劉之所理也俗饒稼穡土宜六
擾內扞郊圻外攘夷狄故吾特命禮樂詩書之上將俾爲
長城立監臨戎亦慎茲選以爾自更事任已著公方端介
而不失人心謙和而能宣朕命寵以將軍之號仍加內省
之榮復職舊藩勉終前効

邵常政等可內侍省內謁者監制

勅天子有內諸臣所以參侍奉備傳達而將外諸臣之復
也其或久更事任績効甄明者必擇其良能而分命焉元
從興元朝議郎行內侍邵常政等或扈從於艱難之際或

服勤著廉善之名宜序班資用優階秩夫奠東司而臨象
教爾無忘於肅清將成命以察戎行爾無忘於畏慎正閭
闔以親賓客爾無忘於敬恭行是三者可以長守其祿位
而不離於榮近矣各揚爾職稱朕意焉可依前件

宋常春等可內侍省內僕局令制

勅近制選內臣之善於其職者監視諸鎮蓋所以將我腹
心之命達於爪牙之士也宣義郎行內侍宋常春等皆以
謹信多才得參侍從更掌上府尤見吏能守官無毫髮之
暇勵已有冰霜之操跡其聲實可備監臨汝其往哉予用

訓爾夫處眾莫若順犯眾則不安約身莫若廉奉身則不
足推是兩者引而伸之然後入可以近天子之光出可以
護將軍之旅矣罔或失墜以貽後艱勉當柱國之榮無忘
立表之誓全實可宣德郎行內侍省宮闈局令員外置同
正員常春可徵仕郎內侍省內僕局令員外置同正員

青州道渤海慎能至王姪大公則等授金吾將軍
放還蕃制

勅慎能至王姪大公則等洲東之國知義之道與華夏同
風者爾輩是也冒越深阻和會於庭予嘉乃誠命以崇秩

用奮威衛保爾恩榮無怠無違永作藩服

青州道渤海大定順王姪大多英等授諸衛將軍

放還蕃制

勅大定順王姪大多英等我十有二衛將軍以率其屬皆
匡備左右爲吾近臣自非勲庸不以輕授以汝各贄琛寶
勞於梯航俾耀遠人宜示恩寵歸撫爾類知吾勸來

令狐楚等加階制

門下朕聞君法天大臣體君命數名等威上下以兩昔漢
丞相金印紫綬黃扉黑轡亦所以異車服於百辟也今朕

宰相階級不稱甚無謂焉旣當行慶之恩宜用加崇之典
守門下侍郎同中書門下平章事賜紫金魚袋令狐楚端
慎嚴恪夙夜在公按度懸衡守而不失守中書侍郎同中
書門下平章事賜紫金魚袋蕭俛深敏敬恭寤寐思理伏
蒲焚藁知無不爲守中書侍郎同中書門下平章事賜紫
金魚袋段文昌坦易堅白風雨有常推賢舉能如恐不及
咨汝三后弼予一人汝爲股肱耳目以資予予敷心腹腎
腸以告汝汝其一乃志以奉上周乃惠以接下敬乃事以
臨官是三者孫叔敖嘗用之於楚矣位愈高而士愈戴祿

愈厚而人愈懷夫以朕之不敏不明尚克用濟實賴吾二三臣朝夕之誨詩云無言不酬無德不報爰因進等之詔用申交警之詞各竭乃誠同底於道康天下平泰階而後越級之賜行焉茲謂敘常非以爲報楚可太中大夫俛可朝議大夫文昌可中散大夫餘各如故

蕭俛等加勲制

某等越正月惟朕憲考集大命於朕躬宅憂昏逾罔克攸濟惟爾俛屢贊大儀以詔予一人惟爾文昌作策度以道揚末命俾小子審訓弗違時乃之休王功曰勲茲用報汝

尚克納誨毋忘協心銘於太常永作元輔

蕭俛等加封爵制

門下列爵惟五所以褒有德也朝議大夫守門下侍郎同中書門下平章事上騎都尉襲徐國公賜紫金魚袋蕭俛等外撫四夷內順百度同德比義以堯舜之道事予厥惟懋哉遂行益地之詔俛乃讓封於弟亦協推恩開國承家永綏厥後惟克恭敬以和神人

李逢吉等加階制

某官李逢吉是朕皇子時侍讀也忠孝之訓何嘗忘之惟

秘洎瓊實爲藩臣克壯威猷用以垣翰楊造等祇事內外
夙夜惟寅並沐前恩遞升榮級上下有等式示獎章

李光顏加階制

門下朕聞有天下者道德仁義以爲理城郭溝池以爲固
故曰不教人戰是謂棄之有備無患可以應卒此先王毆
攘戎狄保障黎元之大畧也五原居有夏靈慶之中當馳
豕豺狼之突將搯咽喉之要爰命腹心之臣厥有成功宜
膺茂典邠寧慶等州節度觀察處置等使金紫光祿大夫
檢校司空兼邠州刺史上柱國武威郡開國公李光顏氣

敵三軍心師百行有卞莊之勇守之以仁有日磾之誠濟之以武叱咤則風雲迴合閒宴則罇俎周旋蓋文武之令才真古今之良將是以淮蔡之役百勝功高青齊之師一面居最朕以蕭關尚警馬嶺猶虞五餌之詐可羞百雉之城爰度先是屬役每難其人惟爾良能果諧予願程功而不憊於素訖事而不勞於人比命有司褒乃實力僉曰古諸侯勲德優盛則就加特進以寵之我國家封植崇重有朝請一字以異之予嘉乃勤兼用兩者茲謂上賞爾惟欽哉可特進餘如故

王仲舒等加階制

門下階陛所以升堂奧也厯清貫者亦由是而登進焉國朝由散官而命爲大夫者凡十一等以銀青朝散爲名者非我特制則不克授蓋門戶有蔡戟之榮腰佩有龜綬之異也朝議郎守中書舍人王仲舒等或厯職清近代予格言或分命藩方宣我程品或懸車以請老或持節以臨人或親或能或勞或久皆承需澤之慶宜當並命之榮凡爾四十有三人各服我休命並朝散大夫餘如故

郭釗等轉勲制

粵若十有二勲以馭親賢以詔勞舊以稽秩序以行慶賜而刑部尚書兼司農卿郭釗實我元舅寅亮朕躬傅師洎筆共司予言發揚書命使貳教官長財善物証居環尹夜警晝巡堪致厥政時惟舊老高陽而下五十有六人分命內外祇勤於理越二月發大號於天下延寵庶官錫爾崇勲無替嘉命

武儒衡等加階制

某乙等古人以朝散大夫爲榮是以自矜於歌詠况今由是級者則服色驟加誠足貴矣儒衡等皆吾內外之臣並

在賢能之選頃因慶澤第許崇階朕不食言勉當嘉命

崔元畧等加階制

某官某乙階之設二十有九有庸有事有敘有加用是四者以詔百吏由郕而上至於元畧曰加曰敘進而下至於景曰事曰庸光我侍從之臣且優致政之老詔賢詔德於是乎在堂與益近爾其敬之

胡証等加階制

門下寧遠將軍兼左金吾衛大將軍御史大夫充左街使賜紫金魚袋胡証等近古赦天下則勲秩階爵因緣而行

亦欲與卿大夫同美利也爾等率其屬部分義甚明皆吾勞臣是有恩獎益進榮級宜其允恭

諸使收淄青敘錄將士等授官爵勲制

某等能執干戈討定逋孽功懋懋賞厥惟舊哉分命庶官秩建五等次用於十有二勲式示等威蓋以勞之小大爲上下也

劍南西川節度使下將士史憲等敘勲制

門下劍南西川節度使下准制敘勲將士朝議大夫試太子家令上護軍史憲等蜀形勝之地也南控蠻蜚西搃戎

羌厲禁之勞實賴汝三千八百六十有六人之力使之必報並賜崇勲各懋乃誠曷率以敬可結前件

鄭氏封才人制

勅古者天子設六宮以詔內理是以關雎樂得淑女憂在進賢將聽雞鳴之詩豈惟魚貫之序鄭氏山東令族海內良家每師班女之文嘗慕樊姬之德桃姿焜燿蘭行馨香爰用擇才冀無傷善勉當選進之重無忘和平之心

第七女封公主制

門下長女等抱子弄孫之榮貴賤之大情也朕以四海奉

皇太后於南宮問安之時諸女侍側螽斯之慶上慰慈顏
鴈鳩之仁內懷均養雖穠華尚少出閣未期而湯沐先施
分封有據宜加美號以表令儀可依前件主者施行

王承宗母吳氏封齊國太夫人制

勅故成德軍節度鎮冀深趙等州觀察處置等使金紫光
祿大夫檢校尚書左僕射贈侍中王承宗母燕國太夫人
吳氏魯文在手燕夢徵蘭道以匡夫仁而訓子教日殫竭
誠之操義必資忠戒陳嬰自大之心明於處順是以承宗
辭代之際承元領務之初或輟哭以據牀每形言於憂國

人知趣向道實光明宜受進封之恩用表貫霜之節

李愬妻韋氏封魏國夫人制

勅夫尊於朝婦貴於室由古道也安有邦君之妻而無湯
沐之地乎涼國公李愬妻韋氏德宗皇帝之外孫也笄年
事愬克有令儀天蔭雖高猶執婦道持其門戶使愬有姻
族之和奉其蘋蘩使愬有蒸嘗之潔愬當分閭之際終無
內顧之憂者由此婦也今愬積行累功以致爵位六遷重
鎮名列上台而韋氏猶限彝章未嘗開國甚不稱也因愬
大名之邦式建小君之號可封魏國夫人

贈田宏正等父制

門下朕聞昔者明王之以孝理天下也莫不因嚴以教敬
推類以明恩朕以眇身欽承大寶爲億兆人之君父奉十
一聖之宗祧捧烏號知羣臣有良弓之思瞻彼蒼念羣臣
有所天之感是用仲月五日申命有司大錫追崇式彰餘
慶而魏博等州節度觀察處置等使魏州大都督府長史
田宏正亡父贈兵部尚書庭玠等教必以忠歿而不朽茂
仲弓之德而位屈當年副孔父之恭而福流來裔惟爾宏
正爲朕方叔以殿大邦惟爾夷簡爲朕河間

李夷簡宗室
宰相故云

以光宗籍惟爾度爲朕呂望以司專征子有勞於王家父
豈忘於錫命進以師長之贈加之保傅之尊咨爾三臣告
是五廟永錫忠孝賚於邦家可依前件

贈烏重允等父制

勅朕聞水積者不涸德積者不窮肆我高祖武皇帝傳序
累聖逮予冲人嗣守朝廷之常不克是懼而侯甸藩服亦
克用乂誠賴吾邦伯庶君之不墜吾祖宗之典也追念本
始無忘爾先永錫追榮用彰彝訓檢校司空使持節滄州
刺史烏重允亡父贈工部尚書承玘等根本粹茂源流浚

發載誕頗牧降生申甫或並列藩方或常參鼎鼐承我制
詔備陳孝思皆曰閱禮資忠實賴先臣之教欲報之德願
言克從遂命褒崇以示幽顯可依前件

贈韓愈等父制

勅國子祭酒韓愈父贈秘書少監仲卿等子生則射桑弧
蓬矢以告四方三月孩而名之十年出就外傳孔子雖欲
遠於鯉也而猶教之詩禮所以相承先而重後嗣也然而
免水火之災從師友之後服軒冕以爲卿大夫者一族幾
何人惟爾愈雄文奧學秉筆者師之與某等各用所長列

官朝右榮則至矣其父皆不及焉歿而有知能不望顯揚於地下贈以崇秩慰其幽魂推吾永懷示用怛然於此可依前件

贈韋審規等父制

勅朕嗣立之二月五日在宥天下澤被幽顯凡百執事延崇於先而守尚書左司郎中韋審規父大理卿漸等生有列爵歿有懿行積德於身慶儲於後嘉乃令子爲吾望郎遂可有司之奏以錫先臣之命可依前件

贈田宏正母鄭氏等制

門下檢校司徒田宏正母贈韓國太夫人鄭氏等詩云哀
哀父母生我劬勞欲報之德昊天罔極子欲養而親不待
之詞也朕有臣宏正等皆社稷之臣也或寄重股肱或親
連肺腑而克忠於國克孝於家歌康公念母之詩感日磬
見圖而泣朕方推廣孝以闡大猷迺詔有司深惟贈典若
曰幽魏并揚實鎮之大旣以命於勲賢齊晉清河惟號之
美何用光於窀穸永錫爾類予何愛焉嗚呼子爲列嶽之
崇母用追封之禮亦可謂生榮死哀孝子事親之終也惟
爾欽哉無或失墜可依前件

追封孔戣母韋氏等制

勅穎考叔食美而思遺其親此孝子不違於一飯也而况於萬石在前累茵在側慰心不及非贈而何尚書吏部侍郎孔戣母贈扶風郡太君韋氏等柔以睦姻明於訓子惟嬪之禮始自敬姜擇隣之規優於孟母慶鍾嗣子皆我蓋臣祇告有司丕序先烈錫以大邑達其深誠庶無風樹之嗟且壯秋霜之節可依前件

追封李逢吉母王氏等制

勅孝子之於事親也貧則有啜菽之歡仕則有捧檄之慶

離則有陟屺之歎歿則有累茵之悲推而言之其揆一也不有追錫何以達情檢校吏部尚書使持節襄州刺史李逢吉母贈平陽郡太夫人王氏等皆朕公卿之母也或象感台階生申及甫或氣鍾河嶽非龔則黃出入恩榮羽儀中外苟無善訓安得令人簡想徽猷用宏封邑式光子道以盛母儀可依前件

追封李遜等母制

勅檢校禮部尚書使持節許州刺史李遜母贈義封縣太君崔氏等昔康公貴爲諸侯而念母之詞甚悲悲親之不

逮也曾參仕三釜而其心甚樂樂及於親也今邇等有地
千里有祿萬鍾頤指氣使無不隨順所不足者其惟風樹
寒泉之思乎朕方推廣孝豈吝加恩並封故邑之榮咸慰
循陔之念可依前件

追封王潛母齊國大長公主制

勅檢校兵部尚書王潛母贈晉國大長公主於朕祖宗之
姑姊妹也始以肅雍之德下嫁於公侯淑問怡聲禮無違
者訓其愛子有過嚴君不因恩澤以求郎每致忠貞而事
主使勤富貴戒黷廉能鬱爲勲臣實資聖善徽猷盡在典

禮宜加猶狹平陽之封式廣營邱之地克宣朕命用慰潛心可贈齊國大長公主

追封王璠母李氏等制

勅守起居舍人賜緋魚袋王璠母贈成紀縣太君李氏等
古人云生願爲人兄欲奉養之日長也若此則及子之貴
顯親之榮能幾何人是以聖王因心以設教由是揚名追
孝之禮生焉朕宅帝位思宏大孝乃詔執事追用疏封而
璠等皆以諷賦語言得參侍從欲報之歎發乎肺肝追加
啟土之榮用深罷社之痛可依前件

贈鄭餘慶太保制

勅朕聞仲尼歿而魯公誅之柳莊死而衛靈請往夫以區區魯衛而猶念賢臣碩德也如是况朕小子獲承祖宗寶賴一二元老朝夕教誨以儀刑於四方天胡不仁遽爾殲奪而今而後誰其屏余故金紫光祿大夫檢校司徒兼太子少師上柱國滎陽郡開國公食邑二千戶鄭餘慶始以衣冠禮樂行於山東餘力文章遂成儒學出入清近盈五十年再任台衡屢分戎律凡所劇職無不踐更貴而能貧卑以自牧審直行於臺閣柔睦用於閨門受命有考父之

金史卷之二十一 三
恭待士比公孫之廣焚書逸禮盡可口傳古史舊章如因
心匠朕方咨稟庶罔昏逾神將祝予痛悼何及乞言旣阻
贈典宜加追書保養之榮用彰明允之德可依前件

贈賻王承宗制

勅天子之於百辟也公則有君臣之義私則有父子之恩
生則有列爵以報功沒則有加榮以錫命遠則罷朝以申
悼近則幸第以臨喪而況於代濟勲庸時方委遇死而可
作吾何愛焉故檢校尚書右僕射王承宗海岱孕靈弓裘
襲藝詩書禮樂稟訓於祖先勇敢謨猷自生於誠腑逮居

劇鎮益辨長材每懷戀闕之誠遂行割地之効屢陳密款
方俟來朝天不與年素志沒地表章前上忠懇備存不以
二子爲憂且曰三軍求帥承元繼志雅有兄風雄藩旣耀
於連枝寵秩宜加於幽窅上台之首左輔之崇特越彝章
用明加等忠魂尚在期爾有知可贈侍中仍令所司備禮
冊命賻布帛五百段米粟三百石委度支逐便支送

贈賻裴行立制

勅秦郡守分土疆以牧人漢刺史乘軺車而按部兼是兩
者才唯艱哉而況於鎮定遠荒經畧逋寇毗倚方切忽焉

薨殂不有追崇曷彰憫悼故朝散大夫持節桂州刺史兼御史中丞裴行立積德之門代濟英哲班超奮筆志在功名廊寄秉心義先忠孝累及事任益見良能龔遂著稱於潢池處默去思於交趾遺風尚在錫命宜加寵以貂蟬賻之穀帛用光幽窆式慰營魂可贈左散騎常侍賻布帛三百段米粟二百石仍委度支逐便支送

贈陳憲忠衡州刺史制

勅故元從奉天定難功臣柳州刺史陳憲忠在德宗時執羈勒以從遂加戡難之名在憲宗時沐雨露之恩實被念

功之詔朕敬承先志崇獎舊勲爰命有司用申常典生有熊當其軼歿有雁隨其車可謂男子之哀榮矣可贈使持節衡州諸軍事衡州刺史

贈楚繼吾等刺史制

勅故容州本營經畧招討左押衙兼行營中軍兵馬使檢校太子詹事楚繼吾故廉州古邱營鎮將試殿中監衛宏本等比以荒服不虔侵掠縣道乃詔毅勇爲人毆攘而繼吾等奮不顧身深入巢穴豺狼雖殪蜂蠆誤加方聞振臂之雄忽有歸元之歎其帥具上其功伐請議褒崇言念云

金定全唐文 卷一百四十一 三
亡尤用憫悼不有異等孰以勸忠特追有土之榮用明死
政之節繼吾可贈使持節都督容州諸軍事容州刺史宏
本可贈使持節都督邕州諸軍事邕州刺史

更賜于頔謚制

昔羽父爲無駭請謚於魯侯而衛君亦自稱公叔文子之
跡則考行必在於有司賜謚或行於君命久矣故致仕太
子賓客燕國公于頔祇奉三朝橫鎮襄漢雖便宜從事難
以法繩而武毅立名實爲威克來朝而後亦旣降心敬以
事君明能知子朕以禮存錫命恩在展親考以慮深通敏

之文參用追悔前過之義深詔執事宜謚曰思

追封宋若華河南郡君制

勅司徒之妻有禮齊加石窳延鄉之母有德漢置封邱生
既不渝歿亦宜及故宋若華我德宗孝文皇帝躬勤庶務
寤寐以之乃命女子之知書可付信者省奏中宮而若華
等伯姊季妹三英粲兮皆在選中參掌宥密班妃裂素之
詠謝氏散鹽之章琤然玉音記在彤管先皇帝乙夜觀書
之際亦嘗傳窈窕德象之篇於若華言念云忘禮宜加等
特追封邑豈礙彝章可贈河南郡君

授入朝奚大首領梅落悟孤等二十五人官階制
勅某等各以貴寶會於明庭既飲食以勞之又爵秩以遣
之式所以示懷柔於遠人也爾宜將我皇風慰彼黎獻可
依前件

授入朝契丹首領達于只枕等二十九人果毅別
將制

勅朕聞德教加於四海則遠人斯屆余德不類而爾等實
來良用愧於厥衷是以置野廬以勞其勤委舌人以通其
意始於郊迓還以禮成寵秩仍加厚意斯在被服冠冕無

忘敬恭